

Xoka Kireni Nakau Yonie Xayawotai Akereki kuna

Mua nakau paiya aimore nanunanu xotapa tuku. Yesusu taiwoteneai xuiapu xeika Emisiki Xoiteu xeika nukou nirau Yesusu Kristusu xeikae, tianikati kirenini xonikikemu tumaxi puropinerire xetai. Ukumu xosaupo apimi weinikiteri ninie xoreinikineri nini purunikeri Xoiteu wetepi nu xiraxina.

Nini pa “ukumu xosaupo kinie” ipaki kunaurouneri, mua ouro puroteneai sapi paiya, asinakuni kutu xana xuwe xirouneri. Yesusu nu Xoiteupo Nono, pa xati nu siko xuiapue kakirounuku sie nu apuni kutu saina ouropu sapi xeika etokepuwatixe. Ninie kunauneri, apue Xoiteu xeika ati puropurexina paiya, nu ouropu sapi teure nanunanu wopuwatixe. Asinaku kutu kapia xeika kireu xosikienikepi kapia xeika, pa rania nini ouropu sapi. Pa xati tinie panumu kapia taiwopure eiyoxaku.

Yesusu taiwoteneai apimie panumu kuna xosa xakuniki iyarepia nu xiraxina. Nue kunauna, Yesusue apuni kutu sayeyai xati, Yesusure xonikisuwoteneai xuiapu paiya nini Xoiteu xiri xonikieuneri kireu xuiapu xiri xonikiewopineri.

**Sini memeremu xosa texepuna
ukumu xosaupo apimi kini
weinikitikiri xoreisikexeni**

1.1—3.10

Ekeoma tuku kunaē yarani putawoyai

¹ Sinie kuna ekeoma tukupo kuna uteirounuku. Mua kuna paiya ekimeni kutu puroyai xati, sinie iyeserinuku, ekisikie xekeukiriai. Sinie nu xekerinuku nu xosa xupusiki iyarikiriai.

² Mua ekisikiomae yarani putauwoyai xati, sinie xekerinuku, paire kuna uteirounuku. Pa ekisikiomae atina sipesi sipesi purotaire sinie tini xosa kunaunuku. Ekime nue nupo Omo xeika puroyaie yarani putawati ekeukiriai.

³ Sinie xekeri iyesikiriai xati, tinie sini xeika xosikikemu tumaxi puropure tini xosa rania, kuna uteirounuku. Pa xati nupo Omo xeika, Nukou Nirau Yesusu Kristusu xeika kirenini xosikikemu tumaxi purinuku.

⁴ Sikou nimariri xiri xokopexepinaure sinie mua nakau xayaukiriai.

Sini memeremu xosauni kutu texepu

⁵ Yesusu Kristusue kuna uteiwati iyeserinuku, sinie tini xosa uteinuku. Pa kuna muanumu, Xoiteu nu memeremu xati, xayakaxayaka kire ukumu nu xosa puratixe.

⁶ Sini kunaunuku, “Ye nu xeika kirenini xoikemu tumaxine,” xepinena pana sini ukumu xosa texinukua, sinipo mua kuna paiya xorei kuna xati, sini suau kapiarei texikirixe.

1:1 1.1 Yo 1.1-4; 1.14; 20.27;2 Pi 1.16;1 Yo 2.13-14 **1:2** 1.2 Yo 1.14; 21.24;YT 2.32;Ro 16.26 **1:3** 1.3 Yo 17.21;YT 4.20;1 Ko 1.9;1 Yo 2.24 **1:4** 1.4 Yo 15.11; 16.24;2 Yo 12 **1:5** 1.5 Yo 1.9; 9.5; 12.35-36;1 Ti 6.16;Ye 1.17;1 Yo 3.11 **1:6** 1.6 2 Ko 6.14;1 Yo 2.4

⁷ Pana nuko memeremu xosa purotai sieni, sini memeremu xosa texinukua, sini Xoiteupo kireu xuiapu xeika xosikikemu kirenini tumaxi purinuku. Pa xati Xoiteupo Nono, nu Yesusu, nupo yawie sikou xokupa xunu xesauwati xosei sairounuku.

⁸ Sini kunaunuku, “Ye xunu xuwe,” xirounukuna pana sini sikou xosikikemu xoreunuku xati, suau kuna xosikiro puratixe.

⁹ Pana sini sikou xunure kunauweikiria Xoiteu nukoe kunawoyai sie panumu kakepina. Nue asinaku kutu kapia kakinapa sikou xunu wetepina. Kakina xokupa kapia xoxi siko xosa purotai xesauwatia xosei puporu.

¹⁰ Sini kunaunuku, “ye xunu eriyaixe,” xepuna pana pa kuna paie kunaunuku Xoiteu nu xoreitua xinuku. Pa xati Xoiteupo kuna xosikiro puratixana xuwe.

2

Kristusu nu sikou tianisikepi

¹ Tini yeu nono misiarara xura, tini xunu erepu xuweuwakuaire, mua kuna tini xosa xayaune. Kire apue xunu eratia, sini sikou tianisikepi tuku, nu nupo Omo xeika purina. Nu siko xopuopu apu nu Yesusu Kristusu, pa apue asinaku kutu kapiiani kutu kakepina.

² Nue nukoini sikou xunu xesawopure saina

1:7 1.7 Ais 2.5;Yo 3.21;Ep 1.7;Ip 9.14;1 Pi 1.19;XKY 1.5; 7.14 **1:8**
1.8 Yop 9.2;Siri 32.5;Asin 28.13;Ye 3.2;1 Yo 2.4 **1:9 1.9** Siri
 51.2;Asin 28.13;1 Yo 1.7 **1:10 1.10** 1 Yo 1.8 **1:10 1.10** Siri
 14.3;Ais 53.6; 64.6 **2:1 2.1** Ro 8.34;1 Ti 2.5;Ip 7.25; 9.24 **2:2**
2.2 Yo 1.29; 11.52;Ro 3.25;2 Ko 5.18;Kl 1.20;1 Yo 4.10; 4.14

teyai. Nue sini kireni tianisikepure mua saina teyaixe. Xuwe. Xokupa xuiapu ouro puroteneai tianikepure kakeyai.

Apu Xoiteu sipani kutue, Xoiteupo kapia tairouna

³ Sini Xoiteupo kunani kutu tainukua nu sipaukiriare xiri atinuku sipawopu.

⁴ Kire apue kunauna, “Ye Xoiteu sipani kutu,” xepina. Pana nu Xoiteupo kunani kutu taiwopu xuweuna paiya, pa apu nu xoreitua xati, nupo xoukemuro kunani kutu puratixe.

⁵ Kire apue Xoiteupo kuna taina paiya, nu nupo xoukemu Xoiteu tuwopi xiri sipa xati, sini panumu kapiarei, Xoiteu xeika etokinuku.

⁶ Kire apue kunauna, “Ye Xoiteu xeika etokine xinapa,” paina pa apua nu Kristusue texeyai sieni texepina.

⁷ Yeu waukia xura, mua Xoiteupo kuna tini xosa xayautiai paiya oma kunaxe. Xuwe. Paiya ekime takieni kutu tikiniai kuna. Pa xipiki kuna paiya takieni iyesikiniai.

⁸ Pana mua kuna tini xosa xayautiai, pa rania oma kuna xati, Kristusupo ekeoma xeika tinipo ekitikioma xeika xosa rania pa suau, pa amure, ukumu xuwexepure xati memeremuni kutu putawotai purina.

⁹ Kire apue kunauna, “Ye memeremu xosa purine,” xepina, pana kire xatau xosa xoukemu

2:4 2.4 1 Yo 1.6-8; 4.20 **2:5 2.5-6** Yo 13.15; 14.21-23; 15.4-5; 1 Pi 2.21; 1 Yo 4.12-13; 4.17; 5.3 **2:7 2.7** 1 Yo 2.24; 3.11; 2 Yo 5-6 **2:8 2.8** Yo 1.9; 8.12; 13.34; Ro 13.12; Ep 5.8; 1 Ts 5.5; 5.8 **2:9 2.9** 1 Ko 13.2; 2 Pi 1.9; 1 Yo 3.10; 3.14-15; 4.20

xoxixina paiya, pa apu nu ukumu xosauni purina.

¹⁰ Apue xatau xoukemu turouna paiya, nu memeremu xosa purirouna. Memeremu xosa paiya kire sapie kakati nu uraki xowopina puratixe.

¹¹ Pana apue kire xatau, nu xosa xoukemu xoxirouna paiya, nu ukumu xosa purina. Nu ukumu xosa texina amu ime tainarau nu sipa xuwe. Nu ukumue eke paraeki.

¹² Tini yeu nono misiarara, Xoiteue Kristusupo wenumurei tinipo xunu weteritiketai. Pa xati ye tini xosa mua kuna xayaune.

¹³ Tini xauwa xura, tini sipani kutu pa apu nu ekimeni kutu puroyai mua pani purina. Pa xati tini xosa mua kuna xayaune.

Tini apimi tenemai xura, tini Satani emeserukiriai. Pa xati tini xosa mua kuna xayaune.

¹⁴ Nono xura, tini Emisiki sipani kutu. Pa xati tini xosa mua kuna xayaune.

Tini xauwa xura, tini sipani kutu pa apu nu ekimeni kutu puroyai xati mua pani purina. Pa xati tini xosa ye mua kuna xayaune.

Tini apu tenemai, tini sokisoki tuku xati, Xoitupo kuna tini xosa sokisoki purati, Satani emeserukiriai. Pa xati ye mua kuna tini xosa xayaune.

Sini ouropu kapia kapia xosikiewopuxe

2:10 2.10 Yo 11.9; Ro 14.13; 2 Pi 1.10; 1 Yo 3.14 **2:11 2.11** Yo 11.10; 12.35 **2:12 2.12** Lu 24.47; YT 4.12; 13.38; 1 Ko 6.11; 1 Yo 1.7 **2:13 2.13** 1 Yo 1.1 **2:14 2.14** Ep 6.10

¹⁵ Tini ouropu kapia kapia xotikiewoto xokupa ouropu sapi xotikiewotowaku. Kire apue ouropu kapia xouweunapa nu Xauwa xiri xouweu-rouwatixe.

¹⁶ Siko sipa, ouropu apimi nikau xokupa kapia paiya, xonikikemu sarepi kapia xeika ekiniki nepi kapia xeika niko xokupa sapire totoniki ouwopi xeikauneri. Pana xokupa kapia paiya Emisikirei koatixe. Xuwe. Paiya nini ouropu kapia kireni.

¹⁷ Mua ou xuwe xatia, mua ouropu xokupa kapia, paiya xosikikemu saropi kapia xeika ekisikienepi xeika rania xirini xuwxepineri. Pana kire apue Xoiteue xouweuwotai kapia taina paiya nu sipesi puropina.

Kristusupo xiwaie putawotai

¹⁸ Yeu nonomi, sini xurisepu asau xosa putaurounuku. Kristusupo xiwayau kopinaxi kuna ekime iyesikiniai. Ximine Kristusupo xokupa xiwaiyaumana kouweteneai. Pa xati siko sipa, sini xurisepu asaupo yause xosa putaukiriai.

¹⁹ Ximuximu pa apimie siko xeika puroneaie, wesiki xowoneai. Pana ninie sikou kini kutu xosauni puropu xuwe. Nini sikouni kutu xakua, nini siko xeikani puraku. Pana muaia siko weisikiteneai, pa xati ati sipaunuku, pa apimi paiya nini sikouni kutu xuwe.

2:15 2.15 Mt 6.24;Ro 8.7; 12.2;Ka 1.10 **2:16 2.16** Ro 13.14;Ye 4.16;1 Pi 2.11 **2:17 2.17** Mt 7.21;1 Ko 7.31;Ye 1.10;1 Pi 1.24 **2:18 2.18** Mt 24.5; 24.24;2 Ts 2.3;1 Ti 4.1;Ip 1.2;1 Pi 4.7;2 Pi 2.1;2 Yo 7 **2:19 2.19** Mt 24.24;Yo 6.37;YT 20.30;1 Ko 11.19

²⁰ Tinie Xoiteupo Supo Youya tieikiriai xati, tini xokupa sipa tuku.

²¹ Pa xati tini kunani kutu sipa xuwexi nanuworine mua kuna tini xosa xayauixe. Xuwe. Ye xayautiaia, pa amure, tinie suau kuna sipauweikiriai xati, suau kuna xorei kuna yararepu xuweuwopina paiya tini sipa.

²² Xoreixepina apu nu yuna? Paiya pa apu nu kunauna, “Xoiteue nukou xuiapu xiyeri tinikepure tumuworetai apu paiya Yesusu xana xuwexi,” kunaaurouna. Apue pa kuna kunawotaia, nue Emisiki xeika Nirau xeika nike tinikirouna, pa xati nu Kristusupo xiwai.

²³ Apue Nono nike tuna paiya Omo rania nike tuna. Apue Nonoure xousuna paiya, nu Omoure rania xousuna.

Xoiteupo Supo Youyae suau kunaure taitaisikirouna

²⁴ Ekime tinie pa kuna iyesikiniai paiya, tini sokisoki ta. Tini ekime tikiniai kuna sokisoki tinari paiya, Nono xeika Omo xeikae tini xeika sipesi puropineri.

²⁵ Kristusue siko sokisoki kuna ipaki kasikina, tini sipesi atinari purakuai ekitikioma tikepine xeyai.

²⁶ Tini xoreitikepure xeteneai apimi nikau kapiaure tini katikepure mua kuna tini xosa xayaune.

2:20 2.20 Yo 10.4;YT 3.14;1 Ko 2.15;2 Ko 1.21;Ip 1.9;1 Yo 2.27
2:22 2.22 1 Yo 4.3;2 Yo 7 **2:23 2.23** Yo 5.23; 14.7-10; 15.23;1 Yo 4.15; 5.1;2 Yo 9 **2:24 2.24** Yo 14.23;1 Yo 1.3;2 Yo 6 **2:25 2.25** Yo 3.15; 6.40; 17.3;1 Yo 1.2; 5.11

²⁷ Pana tinie Kristusu xosaupo Xoiteupo Supo Youya tieikiriai xati, nue tini xeikani purina. Pa xati tini sipa xuweitaatikati xati, ye tini taitaitikepuxe. Xuwe. Xoiteupo Supo Youyaini tini taitaitikirouna xati, pa Youyapu kuna paiya xiri suau. Nu xoreixatixe. Pa xati tini Youyae taitaitiketai sie Kristusu xeika etoka.

Ximine sini Xoiteupo nono purinuku

²⁸ Iyo, yeu nono xura, tini Kristusu xeikani kutu etoka. Kakari nue sosikepure xiyeri koatia sini sokisoki tumunukua, nu ekero mayarei tumuwopuxe.

²⁹ Kristusupo kapia xiri asinakuni kutuxi panumu sipaunaria, xokupa apimie asinaku kutu kapia kaketeneae, Xoiteupo nono sayeteneai xinari rania panumu sipawakuai.

3

¹ Xawa xura, Xauwae sini xouwesikerina nupo xoukemu sikeki sikekina! Sini Xoiteupo nonomixi nue wenisikyai. Paiya suauni kutu, sini Xoiteupo nonomi purinuku. Oupou apimie Xoiteu sipawoneai xana xuwe, pa xati siko rania sipasikerixe.

² Waukia xura, ximine sini Xoiteupo nonomi purinuku. Sewai sini amaki puropua pa sini xemu sipaukirixe. Pana siko sipa, Kristusue yara putawopina yause xosa, sikoe suauni kutu xekeunukua, sini nuko sieni xepu.

2:27 **2:27** Yo 14.26; 16.13; Ip 8.10-11; 1 Yo 2.20 **2:28** **2:28** 1 Yo 3.2; 4.17 **2:29** **2:29** YT 22.14; 1 Yo 3.7; 3.10 **3:1** **3:1** Yo 1.12; 3.16; 16.3; Ro 8.16; 1 Yo 4.10 **3:2** **3:2** Ro 8.18; 8.29; 1 Ko 15.49; 2 Ko 3.18; Pl 3.21; Kl 3.4; 2 Pi 1.4

³ Pa xati, yue Kristusu nukou siexepurexineria, nini kapia kutu asinaku tairouneri. Pa xati Kristusue xosei purotai sie nini rania xosei purineri.

⁴ Apue xunu eretaia nu Xoiteupo tu sokau porouna. Xunu paiya tu sokau porowopi kapia.

⁵ Tini sipa, Kristusue xunu xesauwepure putawoyai xati, nu xosa xunu puratixe.

⁶ Apue Kristusu xeika etokina paiya, nu xunupo kapia tairowatixe. Kire apue xunupo kapia taina paiya, nu Kristusu xekoyai xana xuwxixi sipawopu, pa xeika nu Kristusu sipa xuwe xepu.

⁷ Tini yeu nono misiarara xura, tini sosopa epixakuai, panumu kire apue xoreitixete. Apue asinaku kutu kapia kakatia, nu apu asinaku kutu, nu Apu Kristusu asinaku kutu sie.

⁸ Ximuximu ekimeni kutu xosa, Satanie sipesi xunu erirouna, pa xati apue xunu erirouna paiya nu Satanipo apu. Pa xati Xoiteupo Nonoe Satanipo saina purieina xesauwepure yaraní putawoyai.

⁹ Kire apue Xoiteupo nono saina paiya, nu xunupo kapia tairowatixana xuwe. Xoiteupo ekeomani pa apu xosa purina, pa xati nue xunupo kapia taiwopuwatixe. Xuwe. Nu Xoiteupo nono purina.

¹⁰ Yue Xoiteupo nono xati yue Satanipo nono xinuku sipawopurepa, apue asinaku kutu kapia kakepu xuweuwatia, nu Xoiteupo nono xuwxixi

3:4 3.4 Ro 4.15; 1 Yo 5.17 **3:5 3.5** Ais 53.5-6; 53.11; Yo 1.29; 2 Ko 5.21; 1 Ti 1.15; Ip 4.15; 1 Pi 2.22-24; 1 Yo 2.2 **3:6 3.6** Ro 6.1-2; 6.14; 1 Yo 2.4; 3.9; 4.8; 3 Yo 11 **3:7 3.7** Ro 2.13; 1 Yo 2.26; 2.29 **3:8 3.8** Stt 3.15; Lu 10.18; Yo 8.44; 16.11; Ip 2.14 **3:9 3.9** 1 Pi 1.23; 1 Yo 5.18
3:10 3.10 1 Yo 2.29; 4.8

sipawopu. Pa xeika apue Xoiteupo kireu nonomi xiri xouwenikepi xuweurouna rania nu Xoiteupo xuwe xepu.

Sini kirenikirenien kireu xiri xosikienikepu

3.11—5.21

Kireu xiri xosikienikepi kapia Yesusue atarisiketai

¹¹ Sini kirenikirenien kireu xiri xosikienikepu xetai kuna paiya ximuximuni kutu tinie pa kuna iyesikiniai.

¹² Sini Keini sie puropuxe. Nu Satanipo apu xati xameyau ouweyai. Ama nupo xameyau ouweyaina? Xameyau ouweyaia, amure, nukou kapia xoxi xati, xameyaupo kapia asinaku kutu xati ouweyai.

¹³ Xatai xura, ouropu apimie xiwaixiwaitikeria, tini paire kakixanari xoxi ure urewaku.

¹⁴ Sini Xoiteupo kireu xuiapu xosa xosikikemu tinikirounuku, pa xati siko sipa, sini xumopipo kapia wetikiriai xati, ekisikiomapu kapia xosa purinuku. Apue xataumana xoukemu tinikepu xuweurouna paiya, nu xumopipo kapia xosauni purina.

¹⁵ Apu xatau xiri xouwewopu xuweuna xoukemu xoxixoxixina paiya, nu apu ouwetai siexina. Pa xati tini sipa, apue kire apu ouweina paiya, nu sipesi sipesi ati puropina ekeoma tatixe.

3:11 3.11 Yo 13.34; 15.12; 1 Yo 1.5; 4.7; 4.21 **3:12 3.12** Stt 4.8; Ip 11.4; Yu 11 **3:13 3.13** Mt 5.11-12; Yo 15.18-19; 17.14; 2 Ti 3.12
3:14 3.14 Yo 5.24; 1 Yo 2.9-11 **3:15 3.15** Mt 5.21-22; Ka 5.21; XKY 21.8

¹⁶ Yesusue siko tianisikepure nukou ekeomani wetina xumotai xati, nupo pa kapia paie kireu xiri xosikienikepi kapia atarisiketai. Pa xati sinie rania xatasikimanae Yesusu taiwoteneai tianikepure ekisikioma wetepu.

¹⁷ Pana kire apu nu mua ouropu sapi tukue, kire xatau xekoati xuruara xuweitaupati, nu pa xataure xousuawopu xuweunapa siko sipa, Xoiteue kireu xouwenikirouna kapia pa apu xosa puratixe.

¹⁸ Tini yeu nono misiarara, sini xatasikimana kuna kirenire e supusikie kireni xosikienikepure. Xuwe. Sini sikou xosikikemuni kutu tinikinuku asinaku kapia nini xosa kakepu.

Yesusu taiwoteneae Xoiteu ekero sokisoki tumuwopineri

¹⁹⁻²⁰ Sini kireu xiri xosikienikinukua, sini suau kuna tainuku xinukua sipawopu. Sikou xosikie kire sapire kuna xosa iyaisikerepina sorena, Xoiteu ekero sini yoroara puropu. Pa amure, Xoiteu nu xokupa sapi sipa xati, nupo sipae sikou xosikiro purotai sipa xiri orouna.

²¹ Waukia xura, sikou xosikie kuna xosa iyaisikerepu xuweuwatia, sini Xoiteu ekero sokisoki tumurounuku.

²² Kire sapire kunikuninuku nu kotoukiria, nue sikirouna, pa amure, sikoe nupo kuna tainuku, nue xouwewotai kapia kakirounuku.

3:16 **3.16** Yo 3.16; 13.1; 15.13; Ro 5.8; Ka 1.4; Ep 5.2; 5.25; 1 Ts 2.8 **3:17** **3.17** Tu 15.7; Lu 3.11; 1 Yo 4.20 **3:18** **3.18** Ro 12.9; Ye 2.15-16; 1 Pi 1.22 **3:19-20** **3.19-20** Yo 18.37; 1 Yo 1.8 **3:21** **3.21** Ip 4.16; 10.22; 1 Yo 2.28; 4.17 **3:22** **3.22** Siri 34.15; Yer 29.12; Mt 7.8; 21.22; Yo 9.31; 14.13

²³ Pa xati nupo tu paiya muanumu. Sini nupo Nono Yesusu Kristusue wenumurei xosikisunuku, nukoe siko kasikeyai sie siko kireni kiren timeri kireu xiri xosikienikepu.

²⁴ Kire apue Xoiteupo kuna taina paiya, nue Xoiteu xeika etokati, Xoiteue nu xeika etokina. Xoiteue Xoiteupo Supo Youya siko sikati, Xoiteue siko xeika purinaxi, pa Youyae siko atarisikina.

4

Tini youya erurunikakuai, nini Xoiteurei kounerire e xuwe

¹ Waukia xura, xokupa xoreixoreitua kunatureturei ouro tei xanauneri. Pa xati xokupa apimie tini xosa maneri kunauneri, “Xoiteupo Supo Youyae ye kuna sietai,” xatia kakixanari tini xotikisuwaku. Xuwe. Tini xokupa youya erurunari sipauweinarieye, nini Xoiteurei kote-neaire e xuwerau paiya sipawakuai.

² Takipo kapiiae sipaunapa, Xoiteupo Youya paia muanumu xepina. Apue kunauna, “Yesusu Kristusue apuni kutu sayetai,” xirouna paiya Xoiteupo Youyae pa apu xosa purina.

³ Apue Yesusure muanumu kuna kunawopu xuweuna paiya, pa apu nu xetau youya tuku, nu Xoiteurei koatixe. Paiya Kristusupo xiwaipo youya, ekime takie kopina kuna iyesikiniai. Ximine nu kourotao ouro purina.

3:23 **3.23** Yo 6.29; 13.34; 15.12; 15.17; 17.3; 1 Ts 4.9; 1 Pi 4.8; 1 Yo 2.8-10 **3:24** **3.24** Yo 14.23; 15.10; 17.21; Ro 8.9; 1 Yo 4.12-13 **4:1** **4.1** Mt 7.15; 24.4-5; 24.24; 1 Ts 5.21; 2 Pi 2.1; 1 Yo 2.18; 2 Yo 7; XKY 2.2
4:2 **4.2** 1 Ko 12.3; 1 Yo 5.1 **4:3** **4.3** 2 Ts 2.7; 1 Yo 2.18; 2.22; 2 Yo 7

⁴ Yeu nono misiarara xura, tini Xoiteupo xati, tinie pa xoreixorei kunatureture xoronikieikiniai, pa amure, pa Youya tini xotikiro purotai paie ouropu apimi nikau xonikiro purotai youya orouna.

⁵ Pa apimie nini ouropu apimi. Pa xati ninipo kuna paiya ouropu kireni xati, ouropu apimie ninipo kuna iyesirouneri.

⁶ Pana sini paiya Xoiteupo xati, Xoiteu sipa apimie sinipo kuna iyesinouneri. Pana apu Xoiteupo xuwe paiya, nue sikou kuna iyesirouwatile. Pa kapiarei sini suau kunapu Youya xeika xoreixoreipo youya xeika sipawopu.

Apue Xoiteu xiri xouweuna paiya nu xataumana rania xouwenikepina

⁷ Waukia xura, sini kirenikirenje xatasikimana xiri xosikienikepu, pa amure, kireu xosikienikepi kapia paiya Xoiteupo kapia. Pa xati apue kireu xiri xouweniketai paiya, nu Xoiteupo nono xati, nu Xoiteu sipani kutu.

⁸ Xoiteu nukoini kireu xonikikiewopi kapia xotapa, pa xati apue kireu xouwenikepi xuweurouna paiya, nu Xoiteu sipa xuwe.

⁹ Xoiteu nu Nono kireni tuku xati, siko nu xosa ekisikioma tepure, pa Nono xesawati ouro koyai. Pa kapiarei Xoiteu nukoe sini xiri xouwesiketiae atarisikina.

¹⁰ Kireu xonikiewopi kapia paiya, Xoiteupo

4:4 4.4 Mt 12.29; Yo 16.33; 1 Ko 2.12; Ep 2.2; 6.12; 1 Yo 5.4-5 **4:5**
4.5 Yo 3.31; 15.19; 17.14 **4:6 4.6** Yo 8.47; 10.27; 14.17; 1 Ko 14.37; 2
 Ko 10.7 **4:7 4.7** 1 Yo 2.29; 3.10-11; 3.23 **4:8 4.8** 1 Yo 2.4; 3.6;
 4.16 **4:9 4.9** Yo 3.16; Ro 5.8; 8.32; 1 Yo 5.11 **4:10 4.10** Yo 15.16; Ro
 5.8-10; Ta 3.4; 1 Yo 2.2

kapia. Sini nanunuku ximuximuni sinie Xoiteu xosikieukiniaia xepuxe. Xuwe. Xoiteue akerina sini xouwesikeyai. Pa xati sikou xunu wetepure, nue nupo Sawai Nono xesawati ouro koyai.

¹¹ Waukia xura, nupo kapia paie Xoiteue siko xiri xouwesiketaire atarisiketai. Pa xati sini kirenikirenie kireu xiri xosikienikepu.

¹² Kire apue Xoiteu xekoyaixe. Pana sini kireu xiri xosikienikinukua, Xoiteue siko xeika purati, nupo kireu xonikiewopi kapiae, sikou ekisikioma xosa sokisokietai.

¹³ Xoiteue sini xeika etokati sinie nu xeika etokepua, sini amakinuku sipawopuna? Sini paire sipa, pa amure, sini nue nukou Youyani sikeyai.

¹⁴ Emisikie kakeyai kapia sikoe xekeukiniaia. Nue ouropu xokupa xuiapu xiyeri tinikepure nukou Nono xesawati koyai xati, pa kapiaure sini kuna uteirounuku.

¹⁵ Kire apue kunauna, “Yesusu nu Xoiteupo Nono xinapa,” Xoiteue pa apu xeika etokati, nue Xoiteu xeika etokina.

¹⁶ Paire siko sipa xati ipaki sokisoki xosikisunuku, Xoiteue siko xiri xouwesikati, nupo pa kapiae sikou ekisikioma xosa purina.

Xoiteu nukoini kireu xiri xosikienikepi kapia xotapa. Pa xati apue kireu xiri xouwenikirounae Xoiteu xeika etokati, Xoiteue nu xeika etokina.

4:11 4.11 Mt 18.33; Yo 15.12-13; 1 Yo 3.16 **4:12 4.12** Yo 1.18; 1 Ti 6.16; 1 Yo 2.5-6; 4.18-20 **4:13 4.13** Yo 14.20; 2 Ko 1.22; 1 Yo 3.24
4:14 4.14 Yo 1.14; 3.17; 1 Yo 1.1-2 **4:15 4.15** Ro 10.9; 1 Yo 5.1; 5.5
4:16 4.16 1 Yo 3.24; 4.8; 4.12

¹⁷ Sini panumu purinukua, kireu xosikienikepi kapiae sikou ekisikioma xosa sokisokietai. Pa xati Xoiteupo kokaipa kunapu asaure ximikepuxe. Suau, sini mua ouro purinukuna pana, sini Kristusu nuko sieni purinuku xati, sini ximikepuxe.

¹⁸ Kireu xonikieurouneri xuiapue Xoiteure ximikiroworixe. Ximiketeneai xuiapu kini nini sipa, nini pa kapia xapa xoxi tepineri xati, pa nanunanue kakati Xoiteure ximikineri nini kireu xonikiewopi kapia sokisoki xineri paiya, nini Xoiteure ximikepuworixe. Kire apue Xoiteure ximikirouna paiya, kireu xouwenikepi kapiae pa nupo ekeoma xosa sokisoki xatixe.

¹⁹ Sini Xoiteu xosikieunuku kireu xosikienikinuku paiya amure, Xoiteue ximuximuni siko xouwesikyai xati kakirounuku.

²⁰ Kire apue kunauna, “Ye Xoiteu xiri xoieune xepina,” pana Xoiteupo xuiapu xosaupo kire apu xouwewopu xuweuna paiya, pa apu nu xoreixoreitua. Kire apue Xoiteu xekoyaixe. Pa xati apue xekenikieyai xuiapu xouwenikepu xuweuna paiya, nu xekopu xuweuwoyai Xoiteue xekopuwati xana xuwe.

²¹ Mua kuna Kristus xosaupo tikinia, paiya muanumu. Apue Xoiteu xiri xouweuouna paiya, nu Xoiteupo kireu xuiapu xiri xouwenikepina.

5

Yesusu taiwoteneae mua oupo sokisoki

4:17 4.17 Ye 2.13;1 Yo 2.28; 3.3; 3.19-21 **4:20 4.20** 1 Yo 2.4; 3.17; 4.12 **4:21 4.21** Mt 5.44-45; Mk 12.29-31; Yo 13.34; 15.12;1 Yo 3.23

oroweteneai

¹ Xoiteue nukou xuiapu xiyeri tinikepure tumu-woretai apu nu Yesusu xati xokupa xuiapue nure xonikisuneria, nini Xoiteupo nonomi puropineri. Xokupa apimie Eminiki xonikieuneria, nupo niraumana rania xonikieurouneri.

² Sini Xoiteu xiri xosikieunuku nupo xokupa kuna tainuku, pa kapiarei sipaunukua sini Xoiteupo nonomi xiri xosikienikinuku xepu.

³ Sini Xoiteu xiri xosikieunukua, sini nupo xokupa kuna taiounuku. Pa xati nupo xokupa kunae sini xu sikerixe.

⁴ Xokupa apimie Xoiteupo nono puroteneia, ninie mua ouropu sokisoki orouneri. Sini Xoiteure xosikisunuku xati, pa kapiarei xomaxinuku mua ouropu sokisoki orourounuku.

Xoiteue nukou Nonoure kuna pitewotai

⁵ Yue mua ouropu sokisoki orourounana? Apue Xoiteupo Nono nu Yesusure xousuna paiya, pa apue orourouna.

⁶ Yesusu Kristusue enero ene isepi kapiaure koto, nupo yawi na nikitoto xosa kusawopina kapiaure kotowoyai. Nue enepu kapia kirenire koyaixe. Xuwe. Nu ene xeika yawi xeikapu kapiaure koyai. Xoiteupo Supo Youya nu suau kunapu xotapa xati, Xoiteupo Supo Youyae Yesusu Kristusupo kapiaure kuna uteirouna.

5:1 5.1 Yo 1.12-13; 15.23;1 Yo 2.22-23; 4.15 **5:3 5.3** Mai 6.8;Mt 11.30;Yo 14.15; 14.21-24;2 Yo 6 **5:4 5.4** Yo 16.33;1 Yo 3.9; 4.4
5:5 5.5 Ro 8.37;1 Ko 15.57;1 Yo 4.4; 4.15 **5:6 5.6** Yo 1.29; 1.34; 14.17; 16.13; 19.34;1 Ti 3.16;1 Yo 1.7

⁷ Xeimorei purineri nupo kapiaure kunauwoteneai,

⁸ paiya nini Xoiteupo Supo Youya xeika ene xeika yawi xeikae kaketeneai. Nini xeimorei kireníe kuna kireni kunawoteneai.

⁹ Apue uteirouneri kuna sikoe xosikisurounuku. Pana Xoiteue uteiwotai kuna paie, apu nikau kuna xiri oronikina. Pa kuna Xoiteue uteiyetai paiya, nukou Nonoure kunawoyai.

¹⁰ Apue Xoiteupo Nonoure xousurounae Xoiteue pa kuna uteiwoyai tietai xati, pa kuna nupo xouro purina. Pana apue Xoiteupo kuna xousuwopu xuweunapa, nue Xoiteu nu xoreixor-eituaiyeuna, pa amure, Xoiteue nukou Nonopu kapiaure kuna uteiwoyaire xousuwatixe.

¹¹ Pa kapiarei Xoiteue nukou kuna suauxi atarisikina. Xoiteue sipesi sipesi puropu ekisikioma sikeyai xati, pa ekisikiomapu xotapa paiya nukou Nono xosa purina.

¹² Apue Xoiteupo Nono xeika etokina paiya, nu pa ekeoma tuku. Apue Xoiteupo Nono xeika etokepu xuweuna paiya, nu pa ekeoma xuwe.

Sini sipesi puropu ekisikioma tukuxi sipawopu

¹³ Tini xuiapue Xoiteupo Nonopu wenumurei xotikisurounuku xosa mua kuna xayaune. Tini sipesi sipesi purakuaire ekitikioma tieikiriaire sipawakuai.

5:7 5.7 Yo 1.1; 10.30;XKY 19.13 **5:8 5.8** Yo 15.26 **5:9 5.9**
Mt 3.16-17; 17.5;Yo 5.32-37; 8.17-18 **5:10 5.10** Yo 3.33; 5.38;Ro
8.16;Ka 4.6 **5:12 5.12** Yo 3.36; 5.24 **5:13 5.13** Yo 20.31;1 Yo
1.1-2

¹⁴ Sini Xoiteu nukoe xouwewotai nanunanu tainuku kire sapire kunikuninuku kotounukua, nue sikou kunikuni iyesirouna. Pa xati sini Xoiteure ximikiroukirixe. Xuwe. Sini nuko nutiemu xonarounuku.

¹⁵ Siko sipa, nue sikou xokupa kunikuni iyesirouna. Pa xati nue kire sapi sikepinaure kotounukua, siko sipa pa sapini kutu tepu.

¹⁶ Kire apue xekoati kire xatau Yesusu taiwotaie xunu erati, pa xunue kakati pa apu xumopu xuweuwopina xatia, pa apu nukoini Xoiteu xosa kunikuniwati, Xoiteue pa xatasiki ekeoma tuwopina. Apue xumopi xuweuwopineri xunu erineri xumopu xuweuwopinerire ye kunaune. Apue xunu erineri xumopineri xunu purinana, tini paire kunikuniwakuai xine ye kunautixe.

¹⁷ Xokupa kapia asinaku kutu xuweu paiya xunu. Pana apu xumopu xuweurouneri xunu paiya purina.

¹⁸ Siko sipa, xokupa apimie Xoiteupo nonomi purineria, ninie xunupo kapia tairouworixe. Xuwe. Apue Xoiteupo nono purotaia Xoiteue ati yakurouna xati, Satanie nu xosa xupo iyarepuwatixe.

¹⁹ Siko sipa, siko Xoiteupo nonomi purinuku sorena, mua ou xokupa paiya Satanipo sokisoki irue purina.

²⁰ Siko sipa, Xoiteupo Nono kourotai xati, sikoe Xoiteuni kutu sipawopure, nue nanunanu sikina.

5:14 5.14 Yo 14.13; 16.23; 1 Yo 3.21-22 **5:16 5.16** Mt 12.31-32; Lu 12.10; Ip 6.4-6; Ye 5.14-15 **5:18 5.18** Yo 17.15; Ye 1.27; 1 Pi 1.23; 1 Yo 3.9 **5:19 5.19** Ro 8.10; 8.23; Ka 1.4; 1 Yo 4.6 **5:20 5.20** Ais 9.6; Mt 25.46; Yo 17.3; 1 Ti 3.16; Ip 1.8

Sini Xoiteuni kutu xeika Nirau Yesusu Kristusu xeika etokinuku. Yesusu Kristusu paiya nu Xoi-teuni kutu xati, nue ekisikioma atinuku sipesi sipesi puropu xotapa.

²¹ Yeu nono misiarara xura, tini xokupa xorexorei xoiteu weinikiterinari xetauroni pura.

Xoiteupo Kuna
New Testament in Somau Garia
Nupela Testamen long tokples Somau Garia long
Nuigini

copyright © 2024 Pioneer Bible Translators

Language: Somau Karia

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

56ccf306-a353-5c26-b943-551207f76acc